

Službene novine Federacije BiH, broj 79/15

Na osnovu člana 19. stav (2) Zakona o Vladi Federacije Bosne i Hercegovine ("Službene novine Federacije BiH", br. 1/94, 8/95, 58/02, 19/03, 2/06 i 8/06), u skladu sa članom 17. Pravilnika o upravljanju otpadom od električnih i elektronskih proizvoda ("Službene novine Federacije BiH", br. 87/12 i 107/14), Vlada Federacije Bosne i Hercegovine, na 26. sjednici, održanoj 07.10.2015. godine, donosi

ODLUKU

O USPOSTAVI KOORDINACIONOG TIJELA ZA PRAĆENJE IMPLEMENTACIJE PRAVILNIKA O UPRAVLJANJU OTPADOM OD ELEKTRIČNIH I ELEKTRONSKIH PROIZVODA

I.

Ovom odlukom se uspostavlja Koordinaciono tijelo za praćenje implementacije Pravilnika o upravljanju otpadom od električnih i elektronskih proizvoda ("Službene novine Federacije BiH", br. 87/12 i 107/14), (u daljem tekstu: Koordinaciono tijelo).

II.

Koordinaciono tijelo se sastoji od po jednog predstavnika sljedećih subjekata: 1. Fonda za zaštitu okoliša Federacije Bosne i Hercegovine, 2. Federalne uprave za inspekcijske poslove, 3. Ovlaštenih operatera sistema upravljanja otpadom od električnih i elektronskih proizvoda, 4. Federalnog ministarstva okoliša i turizma.

III.

Zadatak Koordinacionog tijela je praćenje i koordiniranje svih aktivnosti vezanih za implementaciju Pravilnika o upravljanju otpadom od električnih i elektronskih proizvoda ("Službene novine Federacije BiH", br. 87/12 i 107/14), a posebno:

- Razmatranje periodičnih i godišnjih izvještaja uključujući i finansijsku komponentu, ovlaštenih operatera sistema za upravljanje otpadom od električnih i elektronskih proizvoda.- Razmatranje periodičnih i godišnjih izvještaja inspekcije zaštite okoliša i tržišnih inspektora Federalne uprave za inspekcijske poslove, u vezi sa inspekcijskim nadzorom provođenja Pravilnika.- Razmatranje godišnjeg plana namjenskog utroška sredstava Fonda za zaštitu okoliša Federacije Bosne i Hercegovine, koji treba biti usaglašen sa Federalnim ministarstvom okoliša i turizma.- Uspostava jedinstvene evidencije o elektronskom i elektroničkom otpadu kao dijela Registra o postrojenjima i zagađivanjima Federalnog ministarstva okoliša i turizma

IV.

Članovi Koordinacionog tijela imenuju se na period od četiri godine. Koordinaciono tijelo će održavati sastanke po potrebi, a najmanje četiri (4) puta godišnje. Administrativnu podršku radu Koordinacionog tijela i finansijska sredstva potrebna za njegov rad osigurat će Fond za zaštitu okoliša Federacije Bosne i Hercegovine. Koordinaciono tijelo će na prvom konstituirajućem sastanku usvojiti Poslovnik o svom radu.

V.

Koordinaciono tijelo će putem Federalnog ministarstva okoliša i turizma, podnositi godišnji izvještaj Vladi Federacije Bosne i Hercegovine o provedenim aktivnostima na implementaciji Pravilnika o upravljanju otpadom od električnih i elektronskih proizvoda ("Službene novine Federacije BiH", br. 87/12 i 107/14), najkasnije do kraja aprila naredne godine.

VI.

Vlada Federacije Bosne i Hercegovine će rješenjem imenovati članove Koordinacionog tijela, kojeg čine po jedan predstavnik subjekata iz tačke II. ove odluke, s time što svaki ovlašteni operater ima po jednog predstavnika.

VII.

Ova odluka stupa na snagu narednog dana od dana objavljivanja u "Službenim novinama Federacije BiH".

V. broj 1345/2015 07. oktobra 2015. godine Sarajevo

Premijer **Fadil Novalić**, s. r.